

18/09/1998

Boldon pecah rekod Christie

ATO Boldon bukan saja memecahkan rekod pecut Sukan Komanwel di Stadium Nasional malam tadi, malah catatan 9.88 saat itu tergolong antara masa terpanas dunia musim ini.

Sekalipun gagal dalam usahanya untuk memecahkan rekod dunia 9.84 saat, dia tetap puas apabila memecahkan rekod kejohanan 9.91 saat berusia lapan tahun milik Linford Christie dari England, di Auckland.

Tempat kedua acara itu dimenangi Frankie Fredericks dari Namibia dengan kepantasan 9.96 saat dan ketiga, jaguh Barbados, Obadele Thompson, 10.00 saat.

Dalam larian sungguh bersejarah yang bakal dikenang begitu lama oleh peminat olahraga negara ini, termasuk lebih 50,000 penonton di stadium itu, ketiga-tiga pelumba itu menghadirkan pertarungan menakjubkan.

"Saya gembira dengan kemenangan dan masa yang dicatat. Ini bukanlah permainan mudah, sebaliknya begitu sukar untuk menewaskan pelumba yang menjadi rakan anda seperti Frankie dan Thompson.

"Trek ini tidak banyak membantu dan berlari dengan melawan angin bukanlah sesuatu yang mudah, tetapi saya gembira dengan 9.88," kata Boldon pada sidang akhbar selepas majlis penyampaian hadiah.

Frankie yang sekali lagi terpaksa menjadi pengiring berkata, Boldon berhak meraih kemenangan kerana berlari begitu baik dalam persaingan dan dia sendiri tidak kecewa mendapat tempat kedua.

"Saya bangga kerana berjaya memberikan pingat kepada negara saya dan Boldon berhak untuk meraih kemenangan. Ini bukanlah perlumbaan mudah.

"Saya gembira dapat datang ke sini dan jika tidak dapat memenangi emas untuk kejohanan utama, maka itu adalah takdir," kata Frankie, yang memenangi dua perak bagi acara 100 dan 200 meter pada Sukan Olimpik Atlanta, dua tahun lalu.

Thompson, yang menduduki tempat ketiga pula berkata, dia tergelincir pada blok pelepasan menyebabkan dia ketinggalan kepada Boldon dan Fredericks.

"Apabila saya angkat muka, saya dapati kedua-duanya berada di depan dan sukar untuk mengejar mereka. Bagaimanapun, saya tetap puas hati dengan catatan saya.

"Walaupun saya mencatat 9.87 saat di Johannesburg minggu lalu dan di sini pula 10.00 saat, ia adalah dua perlumbaan berbeza," katanya.

Dalam pertarungan semalam yang turut disaksikan Perdana Menteri, Datuk Seri Dr Mahathir Mohamad, Boldon di lorong ketiga dan Fredericks (kelima) berlepas dahulu dengan disusuli Thompson.

Bagaimanapun, pada 20 meter terakhir, Boldon memecut di depan sambil dikejar Fredericks dan Thompson.